

**Singapura tertekan untuk mansuhkan ISA**  
**Malaysiakini.com**  
**September 18,2011**

Singapura kini dalam keadaan tertekan untuk melonggarkan kekangan politik selepas rakan terdekatnya mengumumkan langkah memansuhkan Akta Keselamatan Dalam Negeri (ISA) dan melonggarkan undang-undang lain.

Kumpulan hak asasi dan pembangkang Singapura berkata republik itu perlu mengikut peredaran masa dengan memansuhkan akta yang membenarkan penahanan tanpa bicara dan dikritik sebagai alat menyekat perbezaan pendapat, lapor AFP.

Perdana Menteri Datuk Seri Najib Razak dengan langkah mengejutkan minggu lalu mengumumkan kerajaan akan memansuhkan ISA dan melonggarkan undang-undang yang dirasakan mengekang kebebasan awam, termasuk berkaitan hak berhimpun dan lesen tahunan akhbar.

Tetapi Singapura menegaskan bahawa ISA - yang digunakan terhadap golongan kiri dan pelampau Islam beberapa tahun terakhir - kekal relevan dan undang-undang media sedia ada perlu untuk mengekalkan perpaduan masyarakat.

Bekas anggota parlimen Parti Sosialis Chia Thye Poh menempa rekod sebagai tahanan ISA terlama di republik itu.

Beliau ditahan selama 23 tahun daripada 1966 hingga 1989, diikuti sembilan tahun tahanan rumah.

Sehingga sekarang, sebarang protes di luar kawasan yang ditetapkan masih perlu mendaftar dengan pihak berkuasa dan memerlukan permit polis.

Najib berkata selepas pemansuhan ISA, Malaysia akan memperkenalkan undang-undang baru yang mengekalkan kuasa penahanan pencegahan tetapi untuk tempoh lebih pendek dan tertakluk kepada lebih pengawasan mahkamah.

"Sekiranya Malaysia membukanya (kebebasan), saya rasa mereka bergerak ke depan.

"Ini juga masanya untuk Singapura bergerak ke arah itu," kata Sinapan Samydorai, pengarah Hal Ehwal Asia Tenggara di Think Centre - NGO hak-hak sivil.